

04 AUG 1997

PAMERAN BURUNG AKAN DIADAKAN SERENTAK DENGAN PERTUNJUKAN UDARA

LANGKAWI, 4 Ogos (Bernama) -- Menteri Besar Tan Sri Sanusi Junid hari ini mencadangkan supaya pameran dan pertunjukan burung serta layang-layang diadakan serentak dengan pertunjukan udara sebagai melengkapkan lagi bidang penerbangan.

Katanya ilham terbang daripada burung dengan diikuti layang-layang akan lebih menarik apabila digabungkan dalam satu pertunjukan.

Kerajaan negeri akan mengadakan perbincangan dengan Le Proton LIMA Sdn Bhd untuk bekerjasama dalam bidang itu supaya melengkapkan proses pemikiran dalam industri itu, katanya kepada pemberita selepas Perdana Menteri Datuk Seri Dr Mahathir Mohamad merasmikan Langkawi Fly in 1997 di sini hari ini.

Katanya perbincangan itu akan diadakan secepat mungkin supaya cadangan itu dapat diadakan sebagai acara menarik yang sebelum ini tidak pernah diadakan di negara ini.

Katanya pada mulanya akan terdapat pameran burung, layang-layang, pesawat ringan dan seterusnya: "kita akan dapat menyaksikan kemuncak bagi segala pameran iaitu Pameran Maritim dan Udara Antarabangsa Langkawi (LIMA)".

Sanusi berkata kerajaan negeri gembira kerana pertunjukan pesawat ringan diadakan kerana ia menjadi satu lagi pertunjukan menarik selain LIMA yang telah diadakan sejak 1991 yang membolehkan rakyat di negara ini melihat pelbagai pesawat ringan dipamerkan.

Sehubungan itu kerajaan negeri akan mengadakan pameran model pesawat kawalan jauh sempena sambutan Hari Kebangsaan tahun ini.

--BERNAMA

ZI MS RON